

TENTERA KOMUNIS MEMBUNUH

Komunis Mencengkam Hungary

Rakyat Hungary yang sekian lama tertekan dan ditindas oleh cengkaman Komunis telah bangun melawan, malangnya perjuangan mereka telah dihancurkan dan darah mereka telah mengalir oleh senjata Komunis.

Hungary yang mempunyai penduduk sembilan juta orang adalah mempunyai sejarah gemilang dan hidup merdeka semenjak beberapa kurun. Meskipun Raja-raja Austria keturunan Habsburg menjajah Hungary dalam kurun yang ketujuh belas tetapi Hungary terus berjuang hinggalah berjaya mencapai kemerdekaannya pada tahun 1711. Dalam pada itu Hungary telah berkekalan menjadi salah sebuah dari negeri-negeri yang menjadi anggota dalam empayar Austria.

Dalam perang dunia yang kedua, setelah tentera Hitler dapat dikalahkan Komunis Rusia pun mencengkam Hungary dengan kejamnya tetapi semangat rakyat Hungary tak dapat dipatahkan.

Kilang-kilang perusahaan Hungary telah dirampas oleh Komunis menyebabkan umat Hungary menderita kerugian sebanyak 24 juta dolar. Selain daripada itu, dalam tahun 1945 tentera Rusia telah merampas 4 juta tan gandum dan jumlah yang tidak terhitung daripada binatang-binatang ternak umat Hungary.

Rakyat Hungary telah mendesak pemerintah Hungary yang dipimpin oleh Imre Nagy supaya diadakan pilihan raya bebas. Dengan seberapa segeranya dan menuntut pengunduran tentera Soviet dari bumi Hungary tetapi permintaan rakyat ini telah dijawab oleh Komunis dengan peluru meriam dan kereta-kereta kebal bagi melawan rakyat yang cintakan kebebasan.



Tentera Hungary telah enggan menurut perintah ketua-ketua mereka dari kaum Komunis bagi membunuh bangsa mereka sendiri bahkan tentera Hungary dan kereta kebalnya ini telah berpaling tadah lalu menyokong rakyat dan membedil Komunis.



Rakyat Hungary - lelaki dan perempuan - mengangkat senjata dan membela tanah airnya dari kekejaman Komunis.